

## 2 TESALONICABO

### Tesalonicabo qui Pablonen raanni joi, jahuen rabe sca

#### Raannonx Pablo betan huishahibo

**1** <sup>1</sup>Pablo, Silvano, Timoteo noque rabsibi hihxon tah non mato qui joi raanai, noque huetsabon. Man noquen Papa Dios betan hihquibo, man noquen Hihbo Jesucristo betan hihquibo qui tah non joi raanai, Tesalónica jema janin. <sup>2</sup>¿Noquen Hihbo Jesucristo betan Papa Diosen jahuen shinan mato hinanyamahihquin? ¿Jahuen shinan bichish man sirijaquin shinanax sca jihueyamahin?

#### Tiromabo Papan casticanyaxihqui

<sup>3</sup>Papan joi nincacoinquin tah man shinan hihti caibojahi, noque huetsabon. Jatihixonbi tah man joni huetsahon shinanax hahxonmannanai yanapanhanani. Jaa copi tah hen jascabijaquin Hahxon tah min jai Papan hahcai, mato yocaxonxon. Hahxoncoinquin ta mato coshi hinanahqu. <sup>4</sup>Tiromabaan mato hohmis hohmisjaxon tiromajahibaan bi man tenexon jenexonma shinancoinai tah non noquen huetsabo tocanxon noquenbi jato yohihi. <sup>5</sup>Mato tiromajahiboya honannahue. Papan ta ponte shinanahqu. Janoxon jan jihuemahi janin man hihiyaxahnon ta mato sirijahiqui. Jaa copi tah man yomanahaquehtai. <sup>6</sup>Mato tiromajahibo copixonquin ta Papan jato hihti tiromajayahihquiqui,

jascajaha ta ponte qui hihxon. <sup>7</sup>Hihti perehihnatai chihiyahpa ta naihoh quehax noquen Hihbo Jesus sanarenyaxihquiqui, jahuen coshi yonotibo betan. Joxon ta matoyabi noque tantimayahihquiqui, man rahma tenehibo. <sup>8</sup>Noque tantimaxon bi ta copixonquin noquen Papa Dios honancatsihyamahibo, noquen Hihbo Jesucristo joi siri nincayosmabo jaan casticanyaxihquiqui. <sup>9</sup>Jaan casticana ta jascabi sca queyonihbo hihiyaxihcanihqui. Noquen Hihbo janin ta jaabo jahuentianbi jatimahiqui. Jahuen xabapan xabataima qui ta jato potayahihquiqui. <sup>10</sup>Jaa noquen Hihbo jahuiya tah non noque huetsabo rahsixon jaa hihti coshi non jisayahiqui, nete hihbo. Hihti coshihiya tah non rahte rahteyaxihqui, jahuen joi nincacoinnihbo. Mato rihbi tah man janobi hihtihi, non yohihah nincacoinnish.

<sup>11</sup>Jaa copi tah non mato jascabijaquin yocaxonai: Min jato yohini betanbi senenahbo jato sirijahue Papan, pishinyamahahbo. Sirijaquin shinanxon hahcatsihquibo jatihibi hahcábo miin coshin jato jascajamahue, shinancoinax teetai tihibi rihbi hahcábo jato coshi hinanhue Papan, hah tah non jai mato yocaxonquin. <sup>12</sup>Jascapahboxon tah man jato noquen Hihbo Jesucristo hihti shinanyahi man jismatihu, mato rihbi

jahuen shinanyahpabo jisfbo. Noquen Papan ta mato jascjaxonihqui, noquen Hihbo Jesucristonen rihbi.

#### Jayaxihqui yohitima joni

**2** <sup>1</sup>Noquen Hihbo Jesucristo jahuiton behchinoxon non tsinquijaqueyaxihqui joi sca ta hen mato yohihi, noquen huetsabaan. <sup>2</sup>Noquen Hihbo ta johuanhoxqui jaibaan bi jato nincayamanahue. Yoshiman jascjaquin yohihah bi nincayamanahue. Jonin rihbi jascjaquin yohihah bi nincayamaquin. Noquen huishahahcamaha joi rihbi mato qui nocotaiya bi nincayamaquin. Jasca jaibaan bi rahteyamanahue. <sup>3</sup>Ni jenquetsahpabi mato paranmayamanahue. Papa Dios potacatsihquibo pari ta jotihiqui. Hoa yohitima yoshin pari rihbi ta caintihiqui, hihti tiroma yoshin. <sup>4</sup>Jatihibi Dios hahcaibo potacatsihquin ta hahqui jonibo betihihpaquetai jatihibi rihbi potaquin tanayaxihquiqui, jaabi sca dioscatsihqui. Janoxon Papa yohiti xoboho tsahotax ta Hea ta hen dios qui, hihtihiqui parani.

<sup>5</sup>¿Mato betan hihxon pari hen jaa joi mato yohini man shinanyamahin? <sup>6</sup>¿Jahuen nete nocotaiya pari jaa yoshin cainyaxahnon jahuatohon rahma jaa pantehihquin? Man tah man honanai. <sup>7</sup>Jaa yoshin jotihi tsoan honannih que ma bi ta teesciqui. Hashoan teepanan ta pantenicaton jaa pantehihqui, jahuen pantetima nete noconon caman.

<sup>8</sup>Jaan panteyamascaya ta yohitima yoshin cainscatihiqui. Jaa ta noquen Hihbo Jesusen yohuanxon res rehteyaxihquiqui.

Sanareni joquin jaa queyobahinquin. <sup>9</sup>Noquen Hihbaan jaa queyoyaxihqui ta cainxon yohitimatón jatihibi hahti hahtipahahcamayaxihquiqui, Satanasnen yanapanah. Hahan honanti quescapahbo hahxon ta hahan rahteti quescapahbo hahtihiqui, hahcoinquinma bi paranquin.

<sup>10</sup>Papan jato teehihmapanan ta hihcainai joi

nincacatsiyamahibo hihti tiromajaquin jaa yohitima yoshiman paranyaxihquiqui, queyonicabo. <sup>11</sup>Nincacatsiyamahibo copi ta paramehti shinan Papan jato hinanyaxihquiqui, yoshin quesahi bi hihcainai shinanahbo. <sup>12</sup>Hihcainai joi nincacatsiyamaxon bi tiromajati jenipahichaibo jatihibi hihti casticannoxon ta jascapa shinan Papan jato hinanyaxihquiqui.

#### Papan caisai jahuen jihuetahbo

<sup>13</sup>Jato jascjayaxihqui bi ta matohon noquen Hihbo queenihqui. Maijamenoxon ta Papan mato caisnishqui, mato teehihmayahnoxon, Dios Yoshiman mato sirijaha hihcainai joi man shinancoinaiton mato teehihmanoxon. Jaa copi tah non noquen Papa Dios jascabi yohiti jai: Mia copi ta teehihcanehqui Papan, hahquin.

<sup>14</sup>Mato teehihmanoxon ta Papan mato quenanishqui, noquen Hihbo Jesucristonen xaba man bihyaxahnon hihxon. Non mato yohini joi siripan ta mato quenanishqui. <sup>15</sup>Jaa honanxon shinancoinquin jeneyamaxahnahue, noquen huetsabaan. Non mato honanmahi joi bihquin sirijanahue, noquen janan non mato yohini joi bihxon, huishaxon rihbi non mato yohini bihquin.

<sup>16</sup>Noquehon shinanxon ta Papa Diosen noque jahuentianbi queyotimahi hahan sirijaquin shinanti noque hinanishqui. Hahan jointi sirijahti noque hinanquin.

<sup>17</sup>Noquen Papa Dios betan noquen Hihbo Jesucristonen mato jointi sirijanón tah hen mato yocaxonai. Jahuen shinan siri maton jointi janin nianon, man siribo janon, sirijaquin shinanax yohuanaibo man janon.

#### Noque yocaxonnahue hih Pablo jai

**3** <sup>1</sup>Nea quirica janquenjanoxon sca tah non mato yohihi, noquen huetsabaan. Noque yocaxonnahue, mato

tocan noquen Hihbaan joi jani quescajarahbihi neno rihbi sca caicananon hichaxon nincacahbo. <sup>2</sup>Nincayosmabo ta jaiqui tiroma jonibo. Jaabaan noque bihyananon noque yocaxonnahue. Nincacoinnica rahsima ta jacanihqui hihxon tah non mato yohihi. <sup>3</sup>Noquen Hihbaan ta mato jenebahintimahihqui. Mato ta coshi hinantihiqui. Tiroma yoshiman mato jahuejayamanon ta mato jistihiqui. <sup>4</sup>Non mato yohihi quescabijaquin tah man hahtihhi. Hahxon bi tah man hahribiyaxihqui, noquen Hihbo shinanxon tah non honanai. <sup>5</sup>Noquen Hihbaan mato honanmati tah hen mato yocaxonai, matohon noquen Papa hihti queenai man honannon, Criston mato tenxonni quescajaquin man teneti hahtipahnon.

#### Teeti ta jaiqui

<sup>6</sup>Noquen Hihbo Jesucriston janen tah non huetsa joi rihbi sca mato yohihi, noquen huetsabaan. Non mato yohini quescayamahax bi chiquishax noquen huetsabo jihuetaiya hahbetan hihyamabiresnahue. <sup>7</sup>Mato tocan tah non chiquishax jihueyamapahonihqui. Man tah man honanai. Non coshin teepahoni quescahbinahue, non teeni man honanai quescahbihi. <sup>8</sup>Copijaxonma tah non tsoanahbi piti pihyanamihqui. Bariyahpan teebahinahax tah non yame rihbi niscan niscanax tee teexon

hahpahonihqui, pishinxon mato yocaxon jatsanjamis hihxon. <sup>9</sup>Mato yocaxon res piti hahtipahxon bi tah non noquen coriquinin maronihqui, non hahcai quescajaquin maton rihbi janon hihxon. <sup>10</sup>Mato betan hihxon cah non mato yohinih, teecatsiyamahibo man pimayamanon. <sup>11</sup>Caibo man chiquishax teeyamahe yanca res yohuan yohuanabohi cah non nincacai. <sup>12</sup>Jascapa jonibo tah non hihti yohihi, noquen Hihbo Jesucristonen janen yonoquin. Siripi teenahue, matonahbi maton piti pinixon.

<sup>13</sup>Caibo yanapanquin hahxonquin jeneyamanahue, noque huetsabon. <sup>14</sup>Nea huishaquin non mato yohihi joi nincacatsiyamahibo honannahue. Hihtimahpax jan pontenen hihxon jascapa manayamascanahue. <sup>15</sup>Jascapa tah man maton rahui quescama bi maton huetsa quesca pontequin yohitihhi.

#### Janquenjanoxon yohihi

<sup>16</sup>Jahuen shinan siri hinanquin noquen Hihbaan mato jointi sirijanon tah hen mato yocaxonai, jatihibi tenehax man jointi hihti sirinon hihxon. Mato betanbi jaa jihuenon tah non yocaxonai.

<sup>17</sup>Heen mequemanbi huishaxon tah hen hahan queyoti joi huishascai. Jasca ta hen jai, hean raanai joi jatihibi ta heen huishaya qui. <sup>18</sup>Noquen Hihbo Jesucristonen jahuen shinan siri mato hinanah jaya jihuenahue.